

平度志要

水利

地
124.93
139

地
140.33
139

水利

大姑河春秋左氏傳所謂姑也源出黃縣蹲狗山西南流過招遠
又西南過萊陽又西南入州境西距州城八十里南流至二貞臺
南西入小姑

小姑河春秋左氏傳所謂尤也源出掖縣馬鞏山南入州境上莊
下莊西南距州城九十里南流過蓮花屯西村石樓楊家莊朱村
紙坊朱毛至二貞臺南東受大姑合流南下是為姑河

州東北上匡山西匡山支水南過小店受西來麻石山杵白縣
支水東南過陶家寨算子灣黃同南黃同東入小姑

珠洞河源出鐵匡西南距州城八十里東南流受滴水檐八間房
支水又東南流過石封澗東北受澗口西澗東澗支水又東北受
抱肚山大田東大田支水南流過沙窩後寨徐里西南受石河窰
雲頂山寨頂山支水又西南受扯麻線口簸箕掌小灤河支水又
西南受隆山後隆山前大灤河支水又西南受幡竿山野窪城頂
山轆轤山狼虎崖蹲狗山太平山支水又西南受石柱窪酒館雲
山高孤窟尹福支水又東過院西北受王家流河柴家流河崔家
流河柳圈小柳圈支水又東流過黃灣又北受墨山青山壺天峪
兩目山九龍池龍頭山支水又東流入小姑

珠洞河之南卧牛石釣魚臺雲臺山康王墓趙家嶺即墨村蓬
萊軒隆泉巖山頭支水東合龍虎山支水南過花園古縣北城

子南城子闌後闌前淖泥溝沙埠小溝大溝梁郭莊東入沽河
萊陽五姑河亦名五龍河西南流至即墨劉家莊北西北距州
城八十里西入姑河

即墨橫河西流至州境女兒村南西北距州城九十五里西入
姑河

姑河南流至柏家寨南北村北元開河西流入膠河助漕運名助
水河西北距州城九十里其經流自北村東至沙梁北張院大汪
莊小汪莊入膠州至麻灣入於海

洛藥河源出古蹟山西距州城四十里南流過營裏趙郭莊大白
迤西過河又西北受紅山鳳凰山大壘山小壘山泉水灣支水南
流至李傅莊分派東下過傅家邱魯家邱鐘樓埠胡家莊屋頭東
入沽河其經流自李傅莊南下至瓦子邱郭莊萬家當前埠洞南
入助水河在未開助水之先東入姑河南則經入膠河

助水河西南流過大西頭朱家黃邱西南入膠河

小清河源出張家荒鄧家荒西距州城三十里南流過張家莊澤
科迤西過梁家瓦子邱南流過袁家宋家迤西至西樓子莊南流
至薛家營西流至蘭堤下泊南流至分水嶺入於膠河

白沙河源出明堂山西南距州城四十里東受火灼山榻山支水
西受城子山牛頭山庵子口支水南流西受鷹嵐埠黃山固山石
屋山金華山大寶山小寶山小魚脊山大魚脊山支水南流過河

厓塚子雙廟迤西過東陵西陵元家塔邱郎家莊其經流自北馬邱迤西過姜家劉家南流過院上隋家專溪頭紀家長流莊窩鋪在分水嶺西入膠河是為膠萊北河

峴河源出峴山一名喬家山西南距州城二十五里西流北受大石門小石門小壑口三道嶺觀山洞車門頂皇道口窩落子笆頭山支水南受黃山後北嶺子爐子口華山口公沙山牛蹠山支水西南流過北臺雙廟五畝闌折而東北受歇山桃源洞兩髻山豹竹澗黑石澗金華山支水南流過花園上官尚家疇河頭楊家莊河厓潘家疇八里莊洪溝西過澤科硝場至歐家分派南下過張家邱迤西至蒲家西過岑李家劉家官莊順德營南下過上王家至蔡老墳南入膠河其經流自歐家西至王木匠莊蓼蘭荆家莊長福莊賴家中莊西南至劉家小莊劉家大莊散漫泥窪

城北紫荆山支水及城內外泉池溝渠之水入城西馬家溝西南經李家溝西過防上至長福入於峴河

秦王河源出牛山南距州城二十五里北受茅珠頂支水西南流過二十里鋪東受風山黃泥厓支水西南流過巧女張家楊召北受龐家溝支水西南流過韓家疇東受狀元埠支水南流過邵家疇秦王廟北受榮泉七溝文山武山支水西過艾家疇邢家疇史家莊又北受門村漱玉泉西至盧家入穉養澤西至吳家屋子龍王河自北來入之西流至荒草嶺北受吉林金溝大駕埠支水西

流過東官亭西官亭薛家莊又北受鳴村臺頭支水分派南下經白家嶺劉采家莊子官莊迤西至獅子口西入膠河其經流自薛家莊西經周家郭家又北受黃埠大嶺小嶺支水西流過范家集溫家西入膠河

龍王河源出鳳山南距州城二十五里東受大豁口支水西流過高家南賈家郭家毛家莊分派南下過蕭家竇家下寨鋪大營南至官莊散漫泥窪其經流自毛家莊西至段家疇棠頭徐家溝西南過荷花屯魏家莊皮家營又北受清水甕夾溝茅草屯沈家埠支水又西北受北坦坡南坦坡玉峯嶺蒙埠石嶺梨園潘家埠支水南流至邢胡莊六股路入獮養澤又南至吳家屋子入秦王河合流西入膠河

蘇村河源出虎魄山南距州城四十五里南流過楊家東受高臺山嶺岬山雙山高頂雷鼓頂招風頂車箱頂支水折而南下經上回下回之間西至陳家七公盛家蘇村驛王村七丈朱流丁家分派折而西北經于家太子府史家昌李入鼓厓河又自丁家分派西流過陳家曹家耿家莊石橋艾家屯迤西南至巡寨前盧至鄧家復入蘇村河其經流自丁家西南下至許家孫家石家又西南至馬旺過東縣柳西縣柳又西南過匡家宮家疇流丹埠轉而西北過鄭家莊鄧家西至姜家傅家任家窪迤西北過沙疇朱家高家入於膠河

鼓厓河源出鼓厓山西南距州城七十里西流經姜家莊國家埠
史家昌李南受蘇村河分派合流西過孫家至芳園東入仙嶺河
鼓厓河俗名之陽河誤之萊山在高望山之陰而河在高望山
之陽

仙嶺河源出兌山西南距州城七十五里東受歡喜嶺屏風山陽
支水西流過仙嶺之陽北受仙嶺三山響山蒲山天柱山劈石門
高望山支水西流過羞魚竈河張家馬家至芳園西入之陽河

仙嶺河俗名孫家河

之陽河源出大澤山西南距州城八十里大澤山千巖萬壑之水
總匯釣魚臺前為大澤西北流過角園高家南受屏風山陰勺兒
頭支水西流過盤石觀旋口團石子北受黑石坡秦姑庵山鬼谷
子山乳兒山旋風頂支水又西流過梁家莊昌村之萊山之陽又
北受大頂山黃山紅山之萊山支水又西流過藥石長樂西高家
分派而南至芳園北又回而入於河又南受鼓厓河仙嶺河水合
流西過城郭莊譚家又北受黑羊山界山兌井支水西流至盧鄉
城西分南北派南派自秦家廟西流過鄭古莊沙地泊子北派自
王郭莊西流過庚家姜家沙地泊子又合為一西流過下王家崔
家單家孔家小官道名曰新河西入膠河

之陽河俗名芝陽河之陽者之萊之陽也俗以鼓厓河為之陽
河誤

膠河史記晉世家所謂伐齊東至膠是也源出諸城五弩山北過膠州西過高密折而東至王家邱入州境北距州城一百里過厓邱刁家邱折而西過孫家口譚家莊西入分水嶺姑河分派之助水河亦自東來入之小清河白沙河之分派皆自北來入之分水嶺者非水遇嶺而分也西南東北之水至譚家莊之西萬家之南窩鋪姚家之東匯為深淵平似不流以兩芥並投水中自分左右通志謂南蓄泰山之脈北蓄海上羣山之脈者也左回而東下入沽河合流南入膠州至麻灣入於海是謂膠萊南河右旋而西下過姚家窩鋪迤西北過望竿壩又西北過紙張口祭馬溝又西北過亭口鎮至蔡老墳白沙河自北來入之又西北過小成大成又西北過防頭雙廟又西北過許家閘子閘口北折至獅子口秦王河分派自東來入之北過馬臺闌柯南營至溫家秦王河經流自東來入之又北過韓村三戶山房家旋而東回而西而西北迤而北抱楊家圈而東南又折而北過瓦廟子口大石橋又北過壩口劉家鋪郝家鋪小官道又北至仲家分派西流曰媒河自昌邑城南入濰水今名淮河與淮合流北入於海而淮河水大亦東溢入膠諺所謂膠公淮母媒河合之者也經流自仲家又北至高家蘇村河自東來入之又北至新河鎮新河自東來入之又北過新莊綦家王家大苗家大韓家再北皆斥鹵之地禹貢所謂海濱廣斥是也又北入掖縣境過沙嶺自海倉口入於海水患潰患移惟膠

不潰不移諺曰銅邦鐵底老膠河言其性也故元姚演開膠以運漕此天下萬世之利也明方遠宜王獻李貴劉應節先後言之乃胡櫛徐棻李世達商為正等疊起而沮之我

朝雍正間吏部尚書朱軾復言之內閣學士何國宗巡撫陳世瑄猶執胡櫛等之說此事竟廢今錄崔廷槐與劉大滌郎中論海運書以備采擇其書曰承訊海運事且過以范文正公為諭位卑望淺識量未宏何敢與論國家大事以自附於古人但僕生長海上頗嘗習於見聞敢為執事者私布之夫航海之於漕河安危險易相去懸殊不待智者而後可見我國家監胡元海上之危疏濬漕運歲致江浙間米四百餘萬以實京儲往來無顛危之患出納有畫一之規誠萬世之利也然法久弊生其費反有浮於海運者在昔瓊山邱公已有著論載諸簡冊者可考已兼以近日河流淤塞舟運阻滯上廛宵旰之憂至命重臣出內帑以董治之然糜費日久僅能成功今天下無事商賈蝟集猶可諉者即不幸卒遇兵荒都城生齒百萬日費不貲不知安所仰給耶竊嘗考之昔元之時海道最遠南盡閩廣東極海遼北抵都城帆檣漂泊累歲經年中間風颶之不時潮汐之失候以故顛沛之患難保必無今江南諸路由江由河由湖類能達於淮上無俟海道明矣所可議者自淮以北耳蓋自淮入海風帆一日夜可達青之安東衛舟子舵工多安東人見舟可三百餘艘蓋商賈通行之路也由安東風帆一二日可

達萊之膠州邇者兵備衙門亦嘗由此市買官木往來甚便又由膠州入今之膠萊河西北行二百餘里抵萊之海倉復入於海風帆一二日乃達天津矣聞之漁者不滿四百里云其地坦易無山谿之阻舟行可經可掉天津人往往乘月夜載小艇至海倉市私魚鹽亦有至新河店販載米粟者此皆遵岸依山而行非深入中洋棲泊無地以僥倖嘗試於萬一者比執事倘不以為愚謬而姑有取焉即乞奏議先將河流淤塞者速為修濬責令安東客舟裝載土物海倉膠州天津諸處懸厚賞募舟師為鄉導徑赴天津交割以觀其可行與否不周歲間得失見矣萬一風波之險差減於昔而又可以省費可以集事然後從長議處以求至當歸一之論以為我國家經久之計未必非執事諸公憂國憂民之一端也若曰風颶之不時潮汐之失候顛沛之患難保必無如前所云則今江河之中固亦有然者已而况變見偶出之事又有出於意料之外者乎是誠非僕之明所能逆覩也久稽裁報蕪淺幸教納荷荷廷槐子旦有海運編明史藝文志載之惜未見知州李世昌見舊州守杜志攀膠萊河輿論而善之稱其運程詳切昔案河而得圖今案圖而得河使後之君子得觀覽焉別為一編附諸志尾杜李兩君皆躬歷河干博訪輿論知姚氏修河運漕舊有成效則其倦倦於國計民生至無盡矣而前志將輿論割裂塗改海運舊圖全體變易茲將膠萊河輿論膠萊河海運全圖膠萊河海運程復彙

為一載於左方

膠萊河輿論引

膠萊河元人姚演鑿以漕江南粟者也明開會通河而膠萊遂廢迨挖淺之費日繁或議復修以故主司策士遑遑以此為問余曩於試牘中見之而未悉也甲辰冬承乏茲土丙午有修志之役凡山川形勢人物風土靡不搜致得舊州守杜樵南膠萊河輿論一編其運程及圖尤為詳切昔人按河而得圖今人按圖而得河矣余又躬歷河干統八十二里鑿鑿如指諸掌因並付剞劂而白諸當道不待乘風破浪一展卷而了了心目矣庶使後之君子得觀覽焉三韓李世昌識

膠萊河輿論

杜志攀

膠萊運河入有二處舊曰石落港新曰丁家工元人從石落港入者借大姑河水導之而南又借海潮之水還之而北水勢浹洽負舟有力無奈大姑河駛流淤沙填港石落港青石峻峭磕舟惟是司空劉公於把浪廟前開丁家工借海潮逆入二十里至陳家閘避石且避沙洵稱甯波焉大約河面以六丈闊為度底以四丈寬為度水以六尺深為度

丁家工河面底如式無水宜疏六尺深河自東南來凡歷二十里忽折而直北至陳家村閘

陳家村閘廢基存河面底俱過式水深二尺宜疏四尺深河自此如曲尺形折而西行泊口水王家村水陸家村水都泊水周家

口水自南來入於河泊口水劉家村水杜家村水大盆溝水原
家口水尹家口水蕭家村水三元廟水小姑河水自北來入於河
小姑河口宜建水門凡歷三十里始至吳家口閘平度界也

吳家口閘廢基存河面河底俱過式水深一尺凡歷二十里始至
談家村宜疏五尺深談家村歷十里至分水嶺河面河底俱過
式無水宜疏六尺深劉家村水孫家口水孫家莊水程家口水
談家莊水朱家莊水泊水張家溝水自南來入於河馬家村水
賈家溝水泊口水劉家莊水白沙河水自北來入於河嶺西下
九尺許至窩鋪閘分水嶺形如龜背純土非石白沙河從北來
南穿河之左腋入河河至此東西分流船自麻灣口到嶺當是
逆流而上自嶺到海倉當又順流而下司李來公膠河考謂高
於南北者六丈崔白東海運編謂高於南北海二十丈全河之
工惟此處大費調停宜用保舊法促其閘以蓄之嶺東談家村
須添閘與窩鋪相望可也

窩鋪閘尚留八分河面過式河底僅丈餘水深一尺宜修五尺深
張魯河下名船路溝水宜作水門關王廟水劉家溝水膠河口
水泊口水祭馬溝水紙張口水泊水岔水自南來入於河硝場
河水萬家口水泊口水崖口水泊水牟家村水亭口水自北來
入於河凡歷二十五里始至亭口閘河身至此自東南折而西
北行

亭口閘尚餘強半河面過式河底僅二丈水深一尺宜修五尺深

泊口水楚家莊水泊口水王家莊水王家溝水泊溝水雙黃溝水泊口水自南來入於河董家莊水對泉溝水鯉魚口水泊口水周家莊水山莊溝水梨園溝水程家溝水金家莊水自北來入於河凡歷三十里始至周家閘

周家閘廢基存河面過式河底僅丈餘水深二尺宜修四尺深白塔溝水泊口水李家莊水曹家溝水袁家集水楚家莊黃泥泉水自南來入於河泊口水勒岔溝水泊口水溫家口水自北來入於河凡歷三十里始至玉皇廟閘

玉皇廟閘廢基存河面河底俱過式水深二尺宜疏四尺深河身至此又西北行劉家溝水石橋溝水自西來入於河飲牛溝水王和溝水明家溝水東坡沙水孫家村水泊口水自東來入於河凡歷三十里始至楊家園閘

楊家園閘廢基存河身至此又折而正北行河面河底俱過式水深四尺宜修二尺深張家莊水劉家莊水王家莊水馬家村水媒河水自西來入於河李家村水郝家溝水塔兒溝水城子河水高望山來家河水自東來入於河凡歷三十里始至新河閘新河閘什存其七河面河底俱過式水深五六尺不等宜濬一尺深梭箭溝水自西來入於河董家莊泊水苗兒溝泊水姚家溝水泊口二水自東來入於河凡歷二十五里始至姚家莊河身至此折而西行是世所傳海倉沙嶺閣舟楫運者也海倉三老來

迎日塗飾了事者淘沙移之河岸潮風迅掃岸沙歸河遂相傳
曰此沙龜也日修夜長信若斯言亘古迄今沙與泰岳爭高矣
每歲七八月間天津糴船艤新河岸河水三分借潮七分乘潮
出入直達大洋沙乃為崇耶凡歷三里至海倉龍王昭顯廟元
人重修廟碑云三日出河風帆順利咸神之庥修河人阿都溫
運糧萬戶某千戶某某等茲又沙不為崇之驗乎河身至此又
折而北行又三里連前共三十里至海倉閘

海倉閘廢基存河面河底俱過式潮退水深三尺來公謂宜移閘
於姚家莊此不易之論也窩落水自東來入於河旋河水自西
來入於河又東北七里曰蛤蜊廠岸高一丈二尺水深七尺又
東北五里曰斗清口岸高八九尺不等水深五尺俱宜灣船又
東北十五里水深八九尺不等凡歷二十七里河入海

總計河身二百八十一里溯自口南窮至口北大約來公建閘以
蓄水乘潮以避沙兩言而全河之功括盡無遺矣

膠萊河海運程

運船自淮安府清江浦由淮河九十里至安東縣新壩九十二里至攔頭山入又二十里至安東衛又三十里至夾倉又十八里至舊寨又七十里至夏河所又二十里至古鎮巡檢司東南轉大珠山東北行十五里至靈山衛又二十里至馬家濠俱可避風沿岸行轉至僻家島西行八十里過淮子口二十里出海北入麻灣口由丁家工入膠萊河行二百八十二里至海倉口入北海十里至淮河口又四十五里至魚兒浦又十里至白狼河又二十里至米河十五里至小清河又六十里至九杉巡檢司又百五里至大居河又五十里至徐家溝又七十里至杞溝又一百里至小直沽又一百二十里至丁字沽出海入大直沽河計海運南自清江浦北至大直沽河共一千六百八十二里

糞養澤周禮夏官職方氏東北曰幽州其山鎮曰醫無閭其澤數曰糞養鄭注糞養在長廣漢書地理志琅琊郡長廣縣注糞養澤在西劇清地幽州數續漢志挺城注曰養澤在西幽州數醫無閭在今奉天廣寧縣西北航海而至其地不下四千里長廣縣城今州城也劇清今昌邑地挺城今萊陽馮郭莊西水溝頭東故址猶存水溝頭西樂家寨東地勢愈南愈下直至今即墨東西移風鄉土人呼曰犁養溝考古者謂糞養之訛州城東北皆山也山陰為掖山左為萊陽自蘿藥河入姑河白沙河入膠

萊南河南入海城子河新河大營河入膠萊河北入海之外其餘東條西條羣山支水每當天雨時行盡灌注西南窪中萊陽之西即墨之西北膠州之北高密之東北昌邑之東之東南廣袤五六百里地勢皆下每遇秋潦皆巨浸也合二州四縣之地之下者皆職方所謂糞養澤也州西南白埠中莊之西皮家營張郭莊之南白家嶺丁家莊之東大闌大成澤科東西防頭之北其中荒草嶺牛闌七里澗麻堤馬虎頂李家樓七里澗四十餘村皆昌邑之錯出於州內者也其地統名三泊下亦名官荒蒲魚之利遠近爭取尤糞養之顯焉者也宋元而上無考矣自明以來沿荒居民屢請升科獄訟滋興歲歲私墾不可數計其尤甚者劫盜亡命恃此荏苒關民瘼者固日夜疚心也夫糞養掌於職方合天下而九分居一焉而前志以高密夷安一潭當之其見亦僅僅矣哉



